



Broj: 01-50-1-15-80/05  
Sarajevo, 19. juna 2006. godine

**ZAPISNIK**  
sa 80. sjednice Predstavničkog doma  
Parlamentarne skupštine Bosne i Hercegovine

Osamdeseta sjednica počela je 24. maja 2006. godine u 12,45 časova. Na početku je prisustvovao 31 poslanik. Odsustvovali su Izet Hadžić, Fatima Leho, Vinko Zorić, Nijaz Duraković, Miloš Jovanović, Ljiljana Milićević, Nenad Mišić, Marija Perkanović, Dušanka Majkić, Milorad Živković i Petar Kunić.

Iz Vijeća ministara prisustvovali su predsjedavajući Adnan Terzić, ministri Bariša Čolak i Mirsad Kebo i zamjenici ministara Anton Ril i Enes Bećirbašić.

Iz međunarodnih organizacija prisustvovali su predstavnici OHR, OSCE-a i američke ambasade.

Predsjedavajući Doma Martin Raguž u uvodnim napomenama, pored ostalog, rekao je da je Kolegijum predložio da se, uz predloženu tačku predloženu u pozivu, u dnevni red uvrsti i imenovanje članova Doma u Zajedničku komisiju radi usaglašavanja identičnog teksta Zakona o izmjenama i dopunama Zakona o javnim nabavkama.

Poslije uvodnih napomena predsjedavajućeg, za riječ se javio **Momčilo Novaković**. On je, pored ostalog, rekao da je ovih dana u javnosti bilo mnogo priče povodom izjave predsjedavajućeg Savjeta ministara na posljednjoj sjednici Doma u vezi s realizacijom zaključka Parlamentarne skupštine BiH o formiranju komisije za utvrđivanje istine o dešavanjima u Sarajevu u periodu od 1992. do 1995. godine. Rekao je da su očekivali da će u ovom peirodu dobiti pozitivne signale od Savjeta ministara, da se to stavi na dnevni red, te izrazio razočarenje što takvih signala nema i što predsjedavajući Savjeta ministara ostaje kod svojih stavova. Dalje je rekao da Klub poslanika SDS-a smatra da Savjetu ministara treba ostaviti vrijeme i odgovornost – da na dnevni red stavi formiranje komisije, da komisiju formira, te da razmisli o njegovom odnosu prema ovom pitanju i prema budućim zasjednjima Parlamentarne skupštine.. Obavijestio je, na kraju, da poslanici Kluba SDS-a neće prisustvovati ovoj sjednici.

Predsjedavajući Savjeta ministara **Adnan Terzić** rekao je da vjerovatno konstatacije koje je iznio Novaković spadaju u kategoriju nedobronamjernih konstatacija, s obzirom da je, ako je želio, mogao dobiti informaciju, jer je on juče potpisao poziv za minsitre s dnevnim redom i da je na dnevnom redu informacija koju je ministar Kebo u 10. mjesecu 2004. godine dostavio, a koja se odnosi na zaključak Parlamentarne skupštine. Rekao je da je konstatacija nedobronamjerna i ako zbog toga neko napušta sjednicu Parlamentarne skupštine BiH predsjedavajući Savjeta ministara ne može za to biti odgovoran.

**Nikola Špirić** podsjetio je na sadržaj zaključka koji je Parlamentarna skupština usvojila na plenarnoj sjednici oba doma 23. januara 2004. godine, pa je rekao da nas danas predsjedavajući Savjeta ministara obavještava da je jutros poslao dopis za sutra, a ovih je dana javno izjavljivao da, dok je on predsjedavajući, ta komisija neće biti formirna. Da bismo izgradili puno povjerenje, vratili uvjerenje građanima u snagu ovog parlamenta, ja nemam razloga da vjerujem predsjedavajućem Savjeta ministara, pa Klub poslanika SNSD-a takođe neće danas prisustvovati sjednici, rekao je, pored ostalog, Nikola Špirić, a ostale poslanike je zamolio da razmisle kako da Savjet ministara obavežemo da radi na zaključcima Parlamenta.

Predsjedavajući Raguž rekao je da je kao predsjedavajući, zajedno sa Kolegijumom Doma i Proširenim kolegijumom, učinio sve da se proceduralno ispoštuju poslovnici uslovi za održavanje ove, kao i svake sjednice Doma, te da nema ograničenja za raspravu unutar Doma u skladu s Poslovníkom. Iznio je svoje lično mišljenje da odgovornost institucija treba precizno locirati i da Predstavnički dom ne bi trebalo uskraćivati za kontinuirano i odgovorno djelovanje i zasjedanje.

Momčilo Novaković i Nikola Špirić već su bili napustili sjednicu.

U daljnjoj raspravi učestvovali su Zlatko Lagumdžija, Adnan Terzić, Jelina Đurković, Azra Hadžiahmetović, Tihomir Gligorić i Šefik Džaferović.

Jelina Đurković i Tihomir Gligorić nakon svojih diskusija takođe su napustili sjednicu, a kasnije i Mirko Blagojević.

Predsjedavajući doma Martin Raguž konstatovao je da, prema članu 52. Poslovníka, Dom nema kvorum iz jednog entiteta i da nema uslove za rad. Rekao je da će odmah sazvati Prošireni kolegijum i razmotriti opravdane sugestije i zahtjeve poslanika u vezi s nastavkom rada sjednice.

### **NASTAVAK 80. sjednice sazvan je za 8. juni 2006. godine.** Sjednica je počela u 10,20 sati.

Predsjedavajući Raguž otvorio je nastavak sjednice i konstatovao da su sjednici prisutna 24 poslanika, kao i da su izostanak opravdali Zlatko Lagumdžija, Jozo Križanović, Azra Hadžiahmetović, Adem Huskić, Mehmed Žilić, Ibrahim Đedović i Fatima Leho. Još su odsustvovali Miloš Jovanović, Ljiljana Milićević, Nenad Mišić, Momčilo Novaković, Marija Perkanović, Dušanka Majkić, Milorad Živković, Jelina Đurković, Petar Kunić, Tihomir Gligorić i Mirko Blagojević.

Predsjedavajući je podsjetio i na razloge prekida sjednice i na predložene tačke dnevnog reda.

**Nikola Špirić** je na početku svoje diskusije rekao da je pred ovo zasjedanje dobio kritiku od poslanika iz svih političkih partija iz Republike Srpske što je sazvana ova sjednica, a nisu otklonjeni razlozi zbog koji su poslanici napustili sjednicu. Naglasio je da je Savjet ministara bio u obavezi da formira Komisiju za stradanje Srba, Bošnjaka, Hrvata, Jevreja i ostalih u Sarajevu. Savjet ministara nje taj posao završio, te zbog toga, nažalost, ni danas nećemo imati uslova da raspravljamo o bitnim stvarima, rekao je, pored ostalog Nikola Špirić. Rekao je da je on dao saglasnost u Kolegijumu za sazivanje sjednice, pa je zamolio da i njega kolege shvate. Naglasio je da Vijeće ministara treba ozbiljno shvatiti da Parlament nije igračka s kojom se mogu igrati, te da ni on neće prisustvovati današnjoj sjednici. Zatim je sjednicu napustio.

Predsjedavajući Raguž obavijestio je poslanike i javnost da je odmah nakon prekida sjednice 24. maja obavijestio javnost da ne postoje nikakvi ustavni, zakonski, niti poslovnički uslovi da se osporava rad Predstavničkog doma. Rekao je da je razgovarao sa predsjedavajućim Vijeća ministara koji ga je informisao da su kao prvu tačku na dnevni red sjednice Savjeta ministara stavili formiranje komisije i da je dobio saglasnost Špirića za sazivanje nastavka ove sjednice, pa da su se tako bili stekli svi uslovi za sazivanje sjednice. Ukoliko i danas ponovo dođe do prekida sjednice mislim da će terebati dati jasan odgovor ko je odgovoran za dovođenje u pitanje rada najvažnije zakonodavne institucije u Bosni i Hercegovini, rekao je, pored ostalog, Martin Raguž.

Povodom nastale situacije diskutovali su predsjedavajući Savjeta ministara Adnan Terzić, prvi zamjenik predsjedavajućeg Doma Šefik Džaferović, Elmira Jahić, Beriz Belkić, Mirsad Sipović, Mladen Potočnik i Sead Avdić. Nakon prednjih diskusija predsjedavajući je dao pauzu i pozvao članove Proširenog kolegijuma na sastanak.

Poslije pauze predsjedavajući je konstatovao da su u sali prisutna 24 poslanika – iz Federacije 22, iz RS 2 dva, te da sjednici ne prisustvuje 1/3 iz entiteta koja je neophodan za kvorum, te da se nisu stekli uslovi za nastavak sjednice. Rekao je da je na Proširenom kolegijumu pokušao stvoriti politički ambijent kako bi se nastavio rad Doma, ali da se u tome, nažalost nije uspješelo.

Sjednica je prekinuta u 12 časova.

Treći nastavak 80. sjednice održan je 19. juna 2006. godine, s početkom u 11,05 sati. Prisustvovalo je 37 poslanika. Opravdano su odsustvovali Fatima Leho, Vlatka Komšić, Vinko Zorić, Mladen Potočnik i Marija Perkanović.

Sjednici su prisustvovali Adnan Terzić, predsjedavajući Vijeća ministara, ministri Bariša Čolak i Dragan Doko, te direktor Uprave za intiderktno oporezivanje Kemal Čaušević.

Predsjedavajući Raguž podsjetio je poslanike na prijedlog dnevnog reda. Nije bilo rasprave, pa je konstatovao da 80. sjednica ima sljedeći

### DNEVNI RED

1. Informacija o prvim učincima uvođenja poreza na dodanu vrijednost za razdoblje siječanj – ožujak 2006. (podnositelj: Vijeće ministara Bosne i Hercegovine);
2. Imenovanje tri člana u Zajedničku komisiju oba doma radi usuglašavanja identičnog teksta Zakona o izmjenama i dopunama Zakona o javnim nabavkama.

**Ad – 1:** Informacija o prvim učincima uvođenja poreza na dodatu vrijednost za period januar – mart 2006. (podnositelj: Vijeće ministara Bosne i Hercegovine)

U uvodnim napomenama predsjedavajući Doma Martin Raguž podsjetio je poslanike da su dobili i dopunske materijale uz Informaciju, kao i na Izvještaj nadležne komisije i zaključke koje Komisija predlaže Domu na usvajanje.

Na početku sjednice nije bio prisutan predsjedavajući Vijeća ministara, pa je direktor Uprave za indirektno oporezivanje Kemal Čaušević podnio obrazloženje Informacije.

U ime nadležne komisije govorila je predsjedavajući te komisije Ljiljana Milićević. Potom je stigao i predsjedavajući Vijeća ministara pa je Domu podnio izlaganje.

Povodom Informacije vođena je duža rasprava u kojoj su učestvovali Beriz Belkić, Tihomir Gligorić, Hazim Felić, Mirsad Sipović, Ibrahim Đedović, Zlatko Lagumdžija, Sead Avdić, Momčilo Novaković, Azra Hadžiahmetović, Elmir Jahić, Nijaz Duraković, Ljiljana Milićević, Miloš Jovanović, Muhamed Moranjkić, Mirsad Čeman, Jozo Križanović, Ruža Sopsta i Selim Bešliagić.

Na pitanja postavljena u raspravi odgovorio je Kemal Čaušević.,

Poslije rasprave predsjedavajući Raguž rekao je da je rasprava o Informaciji, bez obzira što je obavljena sa zakašnjenjem, bila izuzetno kvalitetna i da je svaki poslanik dao doprinos da se osvijetli ova izuzetno značajna materija onako kako to i zaslužuje. Zatim je konstatovao da pred Domom sada stoje dva zaključka koje je u Izvještaju predložila Komisija za finansije i budžet, te zaključak koje je predložio Zlatko Lagumdžija i zaključak koji je u ime Kluba SDA predložio Elmir Jahić.

Dalje je predsjedavajući Doma rekao da Dom ima mogućnost ili da se izjasni pojedinačno o svim zaključcima, ili da se zaduži nadležna komisija da na osnovu rasprave da' dodatno pojašnjenje zaključka broj 2. u Izvještaju, tj. da se traži precizan izvještaj, a ne informacija, na tragu iznesenih predloga i sugestija, i da se onda sve to zajedno dostavi Vijeću ministara i Upravi za indirektno oporezivanje.

Zlatko Lagumdžija je intervenisao i rekao da on insistira da se Dom izjasni o prijedlogu njegovog zaključka kojim predlaže da se Informacija odbije. Dodao je da i prijedlog zaključka koji je iznio predsjedavajući i koji i Kolegij podržava, znači isto što i njegov, samo što se daje novi zadatak da se ponovo napravi nešto.

Predsjedavajući Raguž je, nakon prethodne intervencije, na glasanje dao prijedlog Lagumdžije - da se Informacija odbije.

ZA prijedlog zaključka glasao je 16 (Federacija 8, RS 8), protiv 9, uzdržalo se 8 poslanika.

Predsjedavajući je konstatovao da nema entitetske većine.

Prvi zamjenik predsjedavajućeg, Šefik Džaferović, rekao je da ima sumnju u glasanje, pa je zatražio da se glasanje izvrši prozivkom.

Sekretar Doma Branka Todorović izvršila je prozivku poslanika radi glasanja.

Rezultati glasanja prozivkom bili su sljedeći: ZA je glasalo 17 (Federacija 8, RS 9), protiv 9, uzdržalo se 8 poslanika.

Zbog nedostatka entitetske većine izvršeno je usuglašavanje u Kolegijumu kao komisiji i nije bilo saglasnosti.

U drugom krugu glasanja iz Federacije protiv je glasalo 9, što je manje od dvije trećine

Predsjedavajući je konstatovao da je usvojen zaključak koji je predložio Zlatko Lagumdžija – **da Predstavnički dom Parlamentarne skupštine Bosne i Hercegovine odbija Informaciju o**

**prvim učincima uvođenja poreza na dodatu vrijednost za period januar – mart 2006. (podnosilac: Vijeće ministara Bosne i Hercegovine).**

Za riječ se javio Šefik Džaferović. Rekao je da ovi rezultati glasanja, nažalost, pokazuju da je ovdje jača želja za naglašavanjem predizborne kampanje nego realnog sagledavanja stvari u ovako važnoj oblasti kaoš to je PDV. Zatim je zatražio da se na glasanje stavi prijedlog zaključka Kluba SDA.

Dalje je nastavljena rasprava u kojoj su učestvovali Momčilo Novaković, Azra Hadžiahmetović, Nikola Špirić, Tihomir Gligorić, Sead Avdić, Filip Andrić, Beriz Belkić, Ruža Sopta, Petar Kunić, Milorad Živković i Elmir Jahić. Zatim je na glasanje stavljen prijedlog zaključka Kluba SDA, koji glasi:

1. Tražimo promjenu zakona o porezima i doprinosima na plaće u pravcu smanjenja poreskih stopa za PIO i zdravstveno osiguranje. Nedostajuća sredstva za PIO i zdravstveno osiguranje obezbijediti direktnim prebacivanjem viška sredstava prikupljenih od indirektnih poreza sa jedinstvenog računa u fondove PIO i zdravstvenog osiguranja.

2. Tražimo od nadležnih reformu poreza na dobit preduzeća u smislu smanjenje i ujednačavanja stopa. Na ovaj način se obezbjeđuju dodatna sredsddtva za nove investicije i nova zapošljavanja.

2. Podržavamo inicijativu Vijeća ministara o izmjeni člana 72.Zakona o PDV-u u smislu da se povrat PDV-a poreskim obveznicima koji vrše prombet u BiH i investitorima vrši nakon šest mjeseci.

4. Tražimo od entitetskih vlada, Vijeća ministara i Upravnaog odbora Uprave za iandirektno oporezivanje da od viška prikupljenih sredstava od indirektnih poreza uplate u državni fond za povratak 20 mliona KM.

5. Upućujemo inicijativu entitetskim parlamentima i vladama da višak sredstava prikupljenih indirektnim porezima se usmjeri na poboljšanje statusa socijalnih kategorija (RVI, porodice šehid-poginulih, demoblilisanih boraca itd.).

Prijedlog zaključka nije dobio većinu. ZA je glasalo 14, protiv 15, uzdržala se tri poslanika.

**Ad – 2:** Imenovanje tri člana u Zajendičku komisiju oba doma radi usuglašavanja identičnog teksta Zakona o izmjenama i dopunama Zakona o javnim nabavkama

U Zajendičku komisiju imenovani su Tihomiri Gligorić, Filip Andrić i Muhamed Moranjkić.

U 17 sti zavaršena je 80. sjednica.

Sastavni dio Zapisnika je transkript 80. sjednice.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**Martin Raguž**